

PROMOCION DI TUMBA (Y CARNAVAL) DI CORSOW

Ayera bastante yamada a drenta relaciona cu promocion cu varios emisora di Aruba a duna cu transmision directo for di Corsow di e inscripcionnan pa festival di tumba di Corsow.

Por a ripara cu esnan cu a yama tabata bastante rabia y e expresionnan haci no ta cos di publica.

Cu e emisoranan ta transmiti e actividad aki, ta keda na e emisoranan cu awendia tin un concurrencia grandi riba nos isla.

Cada emisora ta busca loke nan ta haya cu ta mihor pa nan oyentenan y pa keda mantene e interes di nan oyentenan cu transmisionnan riba otro isla(nan).

No por kita esaki di nan y ademas tin interesnan comercial di cada emisora pa cada transmision cu nan haci.

PERO TA CULPA DI KEN ?

Si e emisoranan ta dunando e festival di tumba di Corsow tanto interes, ta culpa di ken of kendenan esaki ta ?

Ta culpa di nos mes na Aruba.

Ta nos a pone cu e interes a crece asina tanto pa e festival di tumba y na mes momento pa carnaval di Corsow.

No ta culpa di e emisoranan.

Ta nos mes organizacionnan, **SAC y ASOMA** cu e pleitonan anual, a pone cu e interes ta mas grandi pa Corsow cu pa Aruba.

E cos aki no ta di awe, ta cos cu tabata bisto di varios aña caba y cu a crece poco poco.

Si **SAC** tabata organiza su actividad debidamente cu of sin **ASOMA** y si **ASOMA** tabata organiza debidamente cu of sin **SAC** y tabata tin tur planificacion, y henter e organizacion cla simannan atras caba, nan tabata tin tur caminda habri pa logra un promocion gigantesco na Aruba, no di emisoranan radial so, pero tambe di canalnan di television y di corantnan cu ta circula na Aruba.

E asunto di laga tur cos pa ultimo momento a pone cu no tabata tin tempo di planificacion corda pa promocion.

E pleitonan tambe a haci cu ultimo añanan cantidad di hende ta bay Corsow pa mira e festival aya, pasobra nan a perde smaak di esun di Aruba.

E ambiente di concurso a bay perdi na Aruba varios aña caba y por a nota tambe con publico tabata baha aña tras aña pero cu ni e bailamento di antes riba cada tumba no tabata tin mas durante e festival di Aruba ultimo añanan.

No a mira entrevistanan den corant. y ningun hende tabata sa kende lo participa y cu kico, cu cual banda etc.

Areglistanan y compositornan no tabata haya promocion den

medionan di comunicacion tampoco.

SAC ni ASOMA tabata percura pa duna bida den e concursionan aki. Aña pasa mes cu nan a bini cu un "stagemanager" pa por a organiza mihor a bira cu durante henter e concurso di calypso por ehemplo cada vez papel tabata tin bin dilanti pa por anuncia kende lo bay participa y cu kico, pasobra te na e momento ey durante e festival mes no tabata tin nada organiza.

E stage manager mes no por a traha debidamente pa falta di organizacion y pa 9 or ainda no tabata tin tur inscripcion y tur cantante no a cumpli cu e sorteo ainda.

Esun di tumba a bay mihor aunque tabata tin varios cambio tambe y ta e presentadornan mes tabata traha e programa riba escenario y trata na yena.

For di november caba nos por a lesa con leeuw nan tabata na Corsow y e siman cu a pasa hasta un delegacion di Corsow a bin te Aruba pa duna promocion na nan festival, mientras cu na e momentonan ey tabata tin pleitamento riba nos isla **ATROBE**.

Si e emisoranan duna promocion na parada di carnaval di Corsow tambe, esey ta nos mes falta, pasobra nos hendenan a FADA di e problemanan di **TUR** aña.

Nos tur kier ta capitan pero no kier tuma timon den man, y e capitan cu tin e timon den su man tampoco ta dirigi e barco pa su destino corecto.

Den **POPO** di awe por lesa di e cantidad di comentarionan di diasabra anochi, y nos por haya un idea di kico nos hendenan ta pensa di nos carnaval.

Esey ta muestra tambe cu mester cuminza pasa basora den carnaval di Aruba y tene e "cas" aki limpi pa den futuro, y ademas "duna" e cas un bon gevef si nos kier sigui ricibi admiracion di nos bishitantenan pa nos hogar "carnaval".

Nos tin cu tira culpa riba nos mes y no busca un cacho pa dal cu palo. Pa apertura di "One Cool Summer" lo tin na Aruba algun cien delegado di carnaval di rond mundo den un congreso.

Lo ta verguenza pa e hendenan aki bin haya sa kico ta pasando riba nos isla.

E expectativa ta cu nos gruponan di carnaval lo warda nan disfraznan pa e apertura di "One Cool Summer" cu un mini carnaval di kita sombre hunto cu e gruponan di exterior y nan gruponan musical cu lo bin participa tambe.

Nos mester ta prepara pa muestra un cas limpi y netchi, y no un cas tur borota y slons paden mientras cu pafo e cura di cas ta limpi.

Nos mester por invita e bishitantenan cu orgullo tambe pa mira den nos cas y no laga nan para pafo y admira e cura limpi so.

Juby